



**Broj:**02-04-1145/22

**Datum,** 28.11.2022.godine

**ZAPISNIK**  
**sa 21. redovne sjednice 7.saziva**  
**Općinskog vijeća Doboj Istok**

Dvadesetprva redovna sjednica 7. saziva Općinskog vijeća održana je dana 24.11.2022. godine u zgradi općine Doboj Istok u Klokočnici sa početkom u 10,00 sati.

**PRISUTNI:** 16 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Sulejman Delić, pomoćnik općinskog načelnika za civilnu zaštitu, te predstavnik Televizije Tuzlanskog kantona.

**ODSUTNI:** Senada Džanić, predsjednica kluba vijećnika SBB – BPS.

Sjednicu je otvorio predsjedavajući Općinskog vijeća, Nusret Dautović.

Nusret Dautović, predsjedavajući Općinskog vijeća: „Poštovani vijećnici, uvaženi načelnice, pomoćnici načelnika, mediji sve vas srdačno selamim i pozdravljam. Otvaram 21. redovnu sjednicu 7. saziva Općinskog vijeća Doboj Istok i prije nego što krenemo zamolio bih tehničkog sekretara da utvrdi broj prisutnih na današnjoj sjednici. Znači, prisutno je 16 vijećnika, a odsutna je Senada Džanić opravdano, što znači da imamo kvorum i možemo da nastavimo sa radom.“

**USVAJANJE ZAPISNIKA SA PRETHODNE SJEDNICE OPĆINSKOG VIJEĆA**

Nusret Dautović, predsjedavajući Općinskog vijeća: „Dobili ste Zapisnik sa 20. Redovne sjednice 7. saziva Općinskog vijeća Doboj Istok. Ima li neko primjedbi na zapisnik? Ukoliko nema, ko je za ovakav zapisnik?“

Glasanje: ZA – 16, PROTIV – 0, UZDRŽANIH – 0.

**VIJEĆNIČKA PITANJA**

Nusret Dautović, predsjedavajući Općinskog vijeća: „Ima li vijećničkih pitanja? Ukoliko nema vijećničkih pitanja prelazimo na dnevni red.“

**USVAJANJE DNEVNOG REDA**

Nusret Dautović, predsjedavajući Općinskog vijeća: „Danas su bile planirane četiri tačke dnevnog reda, ali smo dobili prijedlog za proširenje dnevnog reda sa još jednom tačkom i to: Razmatranje i usvajanje Prijedloga Odluke kojom se utvrđuje da je od javnog interesa izgradnja pristupnog puta za potrebe sportskog stadiona „Luke“ i institucija koje imaju poslovni prostor na stadionu. Pošto imamo četiri tačke tu tačku bi stavio pod broj 5. Pročitat ću kompletan dnevni red:

1. Razmatranje i usvajanje prijedloga Odluke o davanju saglasnosti na Ugovor o pružanju vodnih usluga,
2. Razmatranje i usvajanje Nacrta Budžeta općine Doboj Istok za 2023. godinu,
3. Razmatranje i usvajanje Nacrta Odluke o izvršenju Budžeta općine Doboj Istok za 2023. godinu,

4. Razmatranje i usvajanje Informacije o izvršenju budžeta općine Doboj Istok za period januar – septembar 2022. godine,
5. Razmatranje i usvajanje Prijedloga Odluke kojom se utvrđuje da je od javnog interesa izgradnja pristupnog puta za potrebe sportskog stadiona „Luke“ i institucija koje imaju poslovni prostor na stadionu.

Prije izjašnjavanja o dnevnom redu da se izjasnimo o dopuni dnevnog reda koja je planirana da se razmatra kao peta tačka. Ko je za da se ovakvu dopunu dnevnog reda?

Glasanje: ZA – 16, PROTIV – 0, UZDRŽANIH – 0.

Ko je za kompletan dnevni red?

Glasanje: ZA – 16, PROTIV – 0, UZDRŽANIH – 0.“

## **REALIZACIJA DNEVNOG REDA**

### **1. Razmatranje i usvajanje prijedloga Odluke o davanju saglasnosti na Ugovor o pružanju vodnih usluga**

Nusret Dautović, predsjedavajući Općinskog vijeća: „Javlja li se neko po ovoj tački za riječ? Ukoliko se niko ne javlja ko je za ovakav prijedlog Odluku?“

Glasanje: ZA – 16, PROTIV – 0, UZDRŽANIH – 0.

### **2. Razmatranje i usvajanje Nacrta Budžeta općine Doboj Istok za 2023. godinu**

Nusret Dautović, predsjedavajući Općinskog vijeća: „Javlja li se neko za riječ?“

Emira Karić, predsjednica kluba vijećnika SDP: „Poštovani načelnice, kolege vijećnici esalamu alejkum. Nadam se da ovo nećete smatrati negativnim govorom, odnosno negativnom diskusijom, ali bih zaista voljela, jer ovo je nacrt i kada bude prijedlog evo možemo se dogovoriti da nam dostavite u materijalima urnek pisanja amandmana da više ne bi grijehili. Evo vratit ćemo se u prvi razred i nadam se da ćemo se potruditi za gramatičke i pravopisne greške i da to ne budu razlozi odbijanja amandmana. Ja koliko sam shvatila amandman mora sadržavati samo ime i prezime iako garantujem u cijeloj Bosni i Hercegovini amandman sadržava stranku, odnosno politički subjekat. Garantujem. Ali evo nemamo inicijativa, nemamo pravo obratiti se na amandmanu na svoj politički subjekt, samo eto pošto će biti amandmana, jer ja sam lično planirala sa svojim klubom neke stavke pomijerati, pa da nam obezbijedite urnek kako se prihvata amandman na općini Doboj Istok.“

Kemal Bratić, općinski načelnik: „Ja sve selamim i pozdravljam i želim uspješan rad. Naime, općina Doboj Istok je pored drugih općina ušla u MEG projekat. Mi smo već poslali vama vijećnicima ovakav nacrt budžeta, međutim oni sada traže da mi u budžetu imamo određeni iznos sredstava za vodovod i kanalizaciju, odnosno traže da imamo na tom kontu 300 ili čak 400.000 KM. Ja ću predložiti Općinskom vijeću da sa određenih konta skinemo određeni iznos pa da stavimo na konto 821224. Znači predlažem sljedeće i da se tako nacrt budžeta usvoji: da se sa konta 821211 gdje je iznos 420.000 skine 200.000 i prebaci na konto 821224, zatim da sa konta 821613 ucjevljenje vodotoka skine 50.000 i doda na ovaj konto 821224 i sa tim bi zaokružili iznos od 300.000 KM. Oni traže da mi imamo planirano u nacrtu budžeta i ja sam njima predlagao da ćemo to ubaciti u budžet kada bude odluka, međutim oni traže da imamo ovako planirano. Ovo je kompletan iznos vrijednosti projekta s tim da će općina Doboj Istok biti dužna da uplati 60%, a druge organizacije 40%. Ja bih zamolio Vijeće, jer ovo je tehnička stvar, a budžet je živa materija i on odstupa od mjeseca do mjeseca i ne možemo nikada 100% planirati ono što će nas dočekati. Evo imao sam potrebu to da sugerišem.“

Emira Karić, predsjednica kluba vijećnika SDP: „Načelnice, samo ako može malo veća transparentnost. Ja sam razumjela 300.000, 60%, a ostali 40% i sada koliko je to u novcu nije teško izračunati. Da li je to dovoljno? Da li se radi samo o jednoj fazi ili je to kompletan projekat vezano za to što ste planirali? Samo malo pojašnjenja.“

*Kemal Bratić, općinski načelnik: „ To radi naša ekipa zajedno sa našim komunalnim preduzećem. Znači između ostalog radi se na poboljšanju i mislim da jedan dio sredstava ide u zamjenu vodomjera, kompletnih vodomjera. Oni vode kompletnu evaluaciju i naš zadatak će biti samo da obezbijedimo sredstva, odnosno da imamo planirana sredstva u budžetu za unapređenje. Pored ovoga što smo ovih dana raspisali za ova dva projekta za izmjenu cjevovoda preko Ministarstva poljoprivrede ušli smo u MEG projekat koji već dugo traje, da kažem iscrpljujuće i čak smo nekada bili u dilemi da li uopšte da idemo u tu priču. Evo ljudi traže i mi osjećamo obavezu da ispoštujemo ono što oni traže. Znači oni daju 40% sredstava od ukupnog iznosa, a projekat može biti vrijednosti između 300 i 450.000 KM.“*

*Nusret Dautović, predsjedavajući Općinskog vijeća: „ Hvala lijepo. Javlja li se još neko za riječ? Ko je za ovakav nacrt sa izmjenama koje je predložio načelnik?*

*Glasanje: ZA – 11, PROTIV – 0, UZDRŽANIH – 5.*

*Ko je za da se ovaj nacrt Budžeta stavi na javnu raspravu?“*

*Glasanje: ZA – 12, PROTIV – 0, UZDRŽANIH – 1. (tri vijećnika nisu glasala).*

### **3. Razmatranje i usvajanje Nacrta Odluke o izvršenju Budžeta općine Doboj Istok za 2023. godinu**

*Nusret Dautović, predsjedavajući Općinskog vijeća: „ Javlja li se neko po ovoj tački za riječ? Ukoliko se niko ne javlja ko je za ovakav nacrt Odluke?“*

*Glasanje: ZA – 16, PROTIV – 0, UZDRŽANIH – 0.*

### **4. Razmatranje i usvajanje Informacije o izvršenju budžeta općine Doboj Istok za period januar –septembar 2022. godine,**

*Nusret Dautović, predsjedavajući Općinskog vijeća: „ Javlja li se neko za riječ? Ukoliko se niko ne valja ko je za ovakvu informaciju?“*

*Glasanje: ZA – 11, PROTIV – 0, UZDRŽANIH – 5.*

### **5. Razmatranje i usvajanje Prijedloga Odluke kojom se utvrđuje da je od javnog interesa izgradnja pristupnog puta za potrebe sportskog stadiona „Luke“ i institucija koje imaju poslovni prostor na stadionu.**

*Nusret Dautović, predsjedavajući Općinskog vijeća: „ Javlja li se još neko za riječ po ovoj tački? Ukoliko se niko ne javlja ko je za prijedlog Odluke?*

*Glasanje: ZA – 16, PROTIV – 0, UZDRŽANIH – 0.*

*Sa ovom tačkom završavamo današnju sjednicu i zamolio bih sve vijećnike i sve prisutne obzirom da je svečana sjednica danas u 11 sati, u pola 12 je polaganje cvijeća na Centralnom šehidskom mezarju, a 15 do 12 nas je zamolila Mjesna zajednica Brijesnica Velika da prisustvujemo polaganju cvijeća na šehidskom obilježju u Brijesnici Velikoj, pa bih zamolio prisutne ko može da ode i tamo. Bit će delagacija ispred općine i boračkih organizacija.“*

*Sjednica je završena u 10,20 sati.*

ZAPISNIČAR  
Behara Hadžić

SEKRETAR OPĆINE  
Omer Hadžić

PREDSJEDAVAJUĆI  
OPĆINSKOG VIJEĆA  
Nusret Dautović

*Zapisnik je usvojen na 22. redovnoj sjednici Općinskog vijeća Doboj Istok održanoj dana 29.12.2022. godine.*

*U Klokotnici, dana 29.12.2022. godine*

*Zabilješku sačinio  
Omer Hadžić, sekretar Općine*